



TNC.55314/7203(6)
5484


16331



6

46521





蓬廬文彙卷六

行畧

節孝先曾王母朱太君行畧

先考吾堂府君行述

先妣夏太孺人行述

先妣遺事四則

先兄存齋公行畧



節孝先曾王母朱太君行畧

太君姓朱氏茗溪望族也曾祖諱長春崇禎進士光祿寺正
卿祖諱正承貢生羅源縣知縣考諱瀚祖貢生母沈太孺人
年十九歸我曾王父魏子公九載而嫠初五世祖徵君孟純
公有子三高王父文學晦如公最長次簡士公季文學丙山
公生十子曾王父長且賢高王父歿無子卜後曾王父吉以
愛入嗣性篤孝攻舉子業致消渴疾不敢聞于父母既娶家
政悉委太君太君搯作織紉縫紉以佐高王母顧太君嚴祇
事盡歡與本生高王父母俱稱曰孝婦私脫簪珥衣飾易參



藥療曾王父病而躬或藍縷行汲冬日手指皴瘃無愠容內
外稱其難曰貴家女乃能是方曾王父之病革也顧太君老
矣王父孝廉東岡公七歲坐于足諸叔曾祖在寢門曾王母
秉燭侍曾王父左右顧旋屢目太君太君知其意進曰設不
諱我必盡職而從夫子曾王父首領者三乃瞑太君既寡未
嘗一見齒適顧太君所輒怡然作孺慕之色忽一日檢奩具
悉驚所有人莫解其故及得鏹則賫請顧太君曰舅未葬願
以此襄事命王父督運土石將窆親臨穴週視祔棺誠信而
後封顧謂王父爾父志也猶懼不慎顧太君老病痲而噤周
旋床第間數月矢穢必手滌妯娌或問之曰唾涕不見充不
忍之心耳故太君為冢婦介婦無不相觀而善者高王妣歿
呼搶號慟含殮盡禮一如執曾王父喪於本生高王父母稱
是王父早慧幼如成人而太君訓極嚴既長力不能就傳嘗
命侍機杼旁受業文成質諸叔曾祖譽不為喜嘗則必怒流
涕謝罪乃已然嘗者亦絕少登賢書文行為侍御唐公執玉
督學吳公 庶常許公天依推重卒于公車太君痛之教
我父吾堂公叔退翁公益嚴整俱及見其成吾堂公舉鄉闈
捷音至太君亟呼王母及父叔以下長幼環侍詔曰吾事畢

矣將從死者爾曾勉之沐浴更衣而逝蓋去曾王父之歿六
十年得壽八十有七云曾王父之歿有遺腹既而生祖姑母
擇配海鹽庠生崔京錄生子二學淇學泗太君命挈以來同
居二十年教之先後成孝廉學泗與吾堂公同榜也曾祖西
寒公之生高王母以多子不欲舉曾王父固請留之遂小字
哥留六歲失母太君撫之如子長助之成婚以成曾王父志
其識大義敦睦嫻類如此太君生順治己丑四月三十日辰
時卒雍正乙卯九月初十日戌時雍正六年當事以節孝聞
奉 旨旌表曾王父諱學舒儲贈文林郎王父諱奕康熙辛
卯舉人棟選知縣為太君子父諱璟雍正乙卯舉人叔鴻魁
邑庠生為太君孫曾孫四人長大業叔出邑庠生次即廣業
邑庠生次建業叔出次成業塋白疇材村之水門橋塋曾孫
廣業稽首謹述

先考吾堂府君行述

嗚呼府君之逝也

不孝廣業

生才

十歲成業

六歲伶仃延息

迄今十有八年府君嘉言懿行不能具悉惟是大節顯著習

稱於族戚父執間者

不孝

等稍有知識即謹識不敢忘用敢

比拾連掇粗具梗槩以諗來者府君諱璟字鐵梅號吾堂宋

儒元公二十六世孫也隸籍杭州則自宋司農寺丞濬之公

諱嗣源扈駕南渡始八傳至元仲演公諱肇允痛父職方公

猷公諱宣死德祐之難屢徵不出隱居海寧洛塘是為海寧

人七世祖明贈中憲大夫亭山公諱甸為王文成公高弟三

中副榜棄舉子業著書自娛生南鶴公諱啟祥隆慶戊辰進士歷官廣州知府有廉聲陞江西某道未任卒從祀名宦鄉賢無子以弟麗江通判南龍公諱令德子文學孟純公為後孟純公諱明輔天啟間舉賢良方正生文學行于公諱文燭配顧太孺人無出本生高祖文學蕉圃公諱文燧以長子後之曰魏子公諱學舒是為府君祖考娶朱太孺人以節孝旌表考曰東岡公諱弈康熙辛卯舉人揀選知縣妣朱太孺人舉丈夫子二府君伯子也次為先叔父府君為人篤孝友嚴取與之介秉直不阿性喜讀書遇事果斷不交_妄人交必以誠

幼竒慧書入口即能成誦九歲為文能自出意議與羣兒遊有不平輒義形于色嘗乘舟出北新關吏欺其童子也索錢不遂駕詞白稅司稅司怒詰府君徐指廳壁木榜對曰詰我何如讀榜文稅司驚起欲笞吏府君乃揖而退家塾舊有大小會課叔曾祖柯雲公主之大課春秋二仲集羣子姪及通家子五六十人糊名繳卷如棘闈式柯雲公閱至府君卷大詫曰竒才竒才吾黨願有此既知為府君大喜時大父東岡公方以文行為族黨推重柯雲公因賀大父曰若可謂子_有矣府君奉大父訓甚肅大父客授於外嘗手錄先正格言及

古今文尤雅正者寄府君曰此非徒取科名資也宜身體力行之大父歲時歸里門課有常度話言坐立一衷於禮府君帥行無怠年十八補郡學弟子負明年謁桐鄉夏公英三夏公曾大父姑子也見而才之曰我為女孫擇壻久矣今乃得之遂以吾母歸府君康熙己亥大父旅歿都門訃聞府君匍匐星奔扶櫬歸積哀勞遂病咯血當是時曾大母大母俱在堂叔父退翁先生諱鴻魁尚未娶兩姑母未嫁內外告匱府君乃走京師習官文書為治生計都御史唐允功先生諱執玉甚器重之居數月會夏英三公補通山縣招府君同往道出保定府戚屬李公維鈞方官直隸總督久聞府君名及見府君疑其年少會有要務命撰檄草小吏十數人膏楮墨環案側府君援筆立草數千言切中事機李公歎賞不置欲以厚脩留止幕中府君不可曰與尊長約而中道改圖貪利食言人謂我何因乘間脫走通山地瘠民詐號稱難治英三公悉以幕事委府君府君鉅細詳至緩急俱協凡三年通山人皆稱夏公神明英三公引疾去官府君歸會曾大母篤老授徒里門僅給甘旨母孺人以織紉相佐曾大母大母怡然安之一門之內融、藹、俱不自知其貧也府君與叔父相愛

常如兒時叔父少病喘每發府君夜數起雖已疾弗顧叔父亦雅敬府君府君咯血叔父輒籲天曰我不能如兄有用我可死兄不可病聞者感嘆同邑祝人齋先生詮與府君搃角交各以儒業往復討論而必折衷於張楊園先生之論以為歸宿府君待人樂易好獎進後學及有過則面折不少貸問以是取愠於時府君亦不悔損久之人亦無不服府君剛正者祖姑丈陸北溟先生鶚豪士也好使酒罵坐見府君輒默息不敢發聲府君歿先生為廣業等道往事常淚下曰天奪吾友自今誰復規吾過者平生交遊若河南嵩縣王擎齋先生廷琮表叔崔漪園先生學淇蒙泉先生學泗姑丈朱蒿菴先生芹忠叔祖近墅先生思尤為契密律已極嚴常言假道學假氣節皆病在為人因自號吾堂署所居之廬曰省吾雍正乙卯以五經舉鄉試先是曾大母已病亟常問人曰幾時好發榜吾當待之及報捷人至喜曰吾事畢矣遂沐浴更衣而逝府君以天奪之速也每言中舉事即泣然涕下明年武義張明府人崧延府君為壺山院長武義故山僻問學久廢府君條設規約校藝必中程式經府君講貫後先獲雋者甚多戊午正月營墓曾大父曾大母大父於白獐村自井柳以

至至甄甃灰石之屬皆躬親經畫不避雨濕與同役夫寢處
事畢而疾作輾轉加劇迄於不起府君雖病未嘗一日廢書
不孝廣業 隨侍書舍每夜半睡醒府君猶危坐搦管目究烟
烟射帟上 不孝成業 方從叔父受句讀退則侍側府君必教
以童子禮府君之病也嘗叱 不孝廣業 曰吾承祖父訓如爾
時已能屬文端趨向今老大無所成就天也然顛沛困憊歷
數十年力自支撐無一事不可告人即死可見祖父地下恨
不能終事老母且爾兄弟不肖不能瞑耳 不孝 等爾時童騃
無知識不知深痛迄今追誦遺言真不能自容於人世矣痛

哉府君卒於乾隆四年八月二十四日距生康熙三十六年
八月二十七日春秋四十有三府君自為諸生輒試高等著
有四書文五卷經文二卷詩二卷尺牘二卷古文雜著一卷
藏於家配吾母夏太孺人祖英三公諱燦康熙庚辰進士歷
任湖廣通山知縣考方白公諱景賢太學生子二 不孝廣業
縣學生次 不孝成業 女二長壻郡學生張球次壻郡學生陸
堯臣孫一功粹孫女一俱 不孝廣業 出自府君見背母孺人
茹苦食貧命 廣業 稟業叔祖近墅先生 成業 稟業祝人齋先
生莫有成立以竟先君之志而支持門戶則叔父肩之凡十

三年大母即世又三年叔父不祿大故頻仍至不能謀母孺
人一日之養府君有知何以瞑矣伏乞

有道君子賜之銘誄俾後有所考 不孝廣業 等世世子孫感
且不朽

先妣夏太孺人行述

嗚呼痛哉 不孝廣業 等自府君見背三十餘年恃太孺人養
教得有今日而太孺人心力早瘁矣 不孝 等碌碌無所樹立
妄冀邀天竒福謂太孺人康寧壽考可以漸謀甘旨之奉昊
天不弔遽降閔凶欲求一日安養亦不可得不人不子罔極
莫報惟念太孺人貞操懿行動可式法不及今粗纂梗槩久
且湮沒罪且滋大甚是用和淚濡墨畧有述也太孺人夏姓
藉嘉興桐鄉之烏鎮代有聞人曾祖贈文林郎某公諱之鏊
為 廣業 高祖文學孟純公子壻諱醇謹著稱祖英三公諱燦

康熙庚辰進士歷官山東某縣湖廣通山縣知縣並有治績
祖妣沈太君考曰方白公諱景賢太學生妣顧太君以節孝
旌太孺人為方白公仲女生四歲而孤資性莊慧顧太君
教以女紅內則皆能意喻言動具有矩度英三公奇愛之嘗
曰此不凡女非佳壻吾勿字也方英三公之令山左也贈文
林公以年高不樂就養沈太君以下皆留侍於家夏氏家法
素嚴飭每晨起進小食訖太孺人隨祖母母暨諸叔母姑姊
入次第起居畢負墻侍命公必稱說古今孝子淑媛行誼或
道已處約時事以女德相戒勉常翫縷至於亭午太孺人敬
聽無倦容退而如公指以行以故目不窺書動與古合嗣府
君往謁英三公重荷賞識因以太孺人歸焉是時為康熙丁
酉太孺人年十八事曾祖妣朱太君祖妣朱太君皆能曲當
意志先祖考東岡公方應禮部試聞之大喜貽府君書曰吾
聞之家將興婦德順新婦賢孝吾家其昌乎其以吾意喻之
明年祖考旅歿府君扶服至都門迎櫬歸哀勞交積尋病咯
血太孺人既相理喪塋復調護府君病體亦癱發於乳家故
貧至是益困俯仰百須府君館脩所入不足周給薪水醫藥
之費俱無所出太孺人斥典簪珥衣襦佐之猶不足則日夜

工針黹治紡織經易錢以濟負病力作不少休息蓋憂勞從此始矣既而府君客京師客湖南客崑山客杭州最後主武義壺山書院講席勞之奔走出浮於入凡為叔父完娶嫁兩姑母於朱氏徐氏曾祖祖兩世殯塋及親姻饋問延師訓子一切皆太孺人襄府君補苴歲事府君之卒也 不孝廣業十

歲成業六歲皆懵懂無知筑之壁立太孺人見 不孝 等時時

泣下 不孝 等亦泣太孺人則收淚撫 不孝 等曰好好讀書我

便可以不愁督 不孝廣業 尤嚴偶句讀不屬輒舉杖呼 廣業

小名曰靈根爾父病中尚諄諄教爾讀書做人爾不帥欲予 杖

我懼汝父病劇委曲寬解之非姑息汝也今欲再求父杖不

可得其能免我杖乎 廣業 用是痛心自勵每退塾就叔父退

翁先生受周禮叔父憐 廣業 兄弟無他師常憂見顏色會祖

近墅先生授徒接濟僧寮命 廣業 稟業焉叔祖教 廣業 動有

禮法太孺人深用感激 廣業 歲時歸省太孺人未嘗未不流

涕曰爾父力學費志望汝甚厚汝必無忘叔祖卯翼以慰先

人因悉鬻衣資助膏火而躬率姊氏治紡織以給養養殮不

給泊如也 廣業 年二十二始入縣學為諸生而 不孝成業 尚

未有進境同邑祝人齋先生府君執友也方鍵戶纂禮經招

成業往為闡理學緒餘復命廣業分輯表記坊記儒行若干

卷太孺人以不孝漸知向學益加勗勉乾隆二十二年不孝

成業從祝先生入都旋館江西陳氏入胄監不孝廣業亦授

徒湖州吳門暨陽皆奔走於衣食不能日侍太孺人膝下太

孺人性極慈慎自府君多病客遊久諳旅况故不孝等在外

歸稍後期或音問阻滯太孺人輒憂不成寐不孝等由是改

館近地以紓太孺人門閭之望戊子省試不孝廣業受知於

婺源張培風先生幸中亞榜先生為言志目中眉之故惓惓

慰諭廣業為女太孺人縷述深自歎踏太孺人嘆曰兒負知

已命也然我且旦暮入地天其欲使爾吾相依以老乎不孝

廣業悚然奉命自辛春建於今春太孺人屢邁危疾幸即

就痊入夏康健如平常命不孝廣業赴省應試試竣亟歸太

孺人喜見顏色九日晨起方頰面突呼腹痛頃之漸已次日

復然漸發寒熱痛不止而喘作又聞不孝廣業試事報罷若

不豫者然逡巡以至不起嗚呼痛哉太孺人治已甚嚴事府

君如大賓服食器用非手檢勿敢進接先後以誠待姻黨無

不有禮尤能容人過失有忤者置不問雖甚愠無疾言遽容

視從子大業建業如子御臧獲甚寬非大謬不輕呵責生平

衣服有補綻至十數者子婦固請改易勿許曰舊者適體與
吾習吾愛之也人以急告雖甚匱必謀所以濟之隣姬逋欠
累積遺命弗索也嗚呼以先妣之純德無宜享遐齡非不

孝

等罪通於天天寧奪太孺人如是其速嗚呼痛哉太孺人

例贈孺人配府君諱璟字鐵梅號吾堂雍正乙卯科舉人例
授文林郎太孺人生於康熙三十九年五月十四日卒於乾
隆三十五年九月十七日享年七十有一子二長不孝廣業

乾隆戊子科副榜候選直隸州州判娶嘉興盛氏增廣生諱
支榮公女次不孝成業國學生娶褚氏太學生諱仲璋公女

女二長適增監生張球次適郡庠生陸堯臣孫四人

勲懋勲

常不孝

廣業

出

勲崇勲旂

不孝

成業

出

孫女二長適朱

不孝

等學淺人微無以為母氏表章萬一伏冀

大人先生俯垂覽擇賜以傳銘

不孝廣業

等死且不朽

先妣遺事四則

夏氏自明比部公起家進士歷曾郎簪纓不絕外高祖為館甥時家適中落五世祖考妣寔資給之洛塘去烏墩七十餘里特置健步二人更番饋遺及外曾祖宦歸山左五世祖考妣及先高曾祖俱下世渭陽之作情鍾舅氏謂先妣醇孝端厚以字府君固相攸有素亦欲敦崔盧之好也

外祖母顧太君湖郡文學諱檝公女也幼通女誡青年誓志教子女有法雍正間與先曾祖妣先後旌門曰節孝先妣之蔚為閨範淵源固有自云

余家自七世祖贈中憲大夫亭山公以下皆聚處洛塘里以詩書為事叔姪兄弟相師友吾母來嬪之日門風方盛嘗設大文會於春秋二仲局門試之糊名投卷以校甲乙府君每與斯會母必先期具乾糗鮮菓以應所需或丙夜治經亦如之族姻謂府君文譽鵲起內助有力焉

先妣篤疾四年每苦肢體滯重嘗語不孝等曰我為病所縛故爾死則病去身當自輕始以為病中厭苦激為此言母又曰後當驗之及臨殯舉屍果輕軟如平人因共嗟異昔南齊顧歡事黃老道解陰陽書卒於剡山身輕柔軟陳姚察誓讀

竟一藏經將終西向正坐念云一切空寂其後身體柔軟顏色如恒並載史傳以為戒定之力吾家梵唄法籙絕於焚誦先妣性尤不嗜既病乃預知解脫此為夙根深厚明矣

先兄存齋公行畧

先兄周氏諱大業字致堂號存齋杭州府海寧州人上溯宋
儒元公凡二十七世自太常卿濬之公諱嗣源從洛南扈蹕
居錢塘七傳職方郎公猷公諱宣舉家殉德祐之難遺孤仲
潢公諱肇允遁隱海寧之洛塘家焉七世祖明贈中憲大夫
亭山公諱甸為王文成公高弟三中副榜入太學著書行世
生南鶴公諱啟祥隆慶戊辰進士歷官廣州知府有廉聲陞
江西某道未任卒崇祀名宦鄉賢無子以弟麗江通判南龍
公諱令德子文學孟純公為嗣孟純公諱明輔天啟間舉賢



良方正生文學行于公諱文燭配顧太孺人是為兄高祖考
妣曾祖魏子公諱學舒係本生高祖文學蕉圃公諱文燄之
長子入繼為後曾祖妣朱太孺人

旌表節孝祖考東岡公諱弁康熙辛卯舉人揀選知縣以兄官

覃恩貤贈文林郎祖妣朱贈太孺人有子二長先考孝廉吾堂公
次先叔父退翁公諱鴻魁邑庠生以兄官

敕贈文林郎叔母朱贈太孺人亦有子二長即兄也次名建業兄
之生不逮事祖考而曾大母朱太君猶在堂撫之曰爾祖積
德累行未獲報後當有興者其在是子乎因小名曰興祖三

歲患痘瘡甚危叔母禱於神靈佑帝而愈六歲從叔祖可村
先生受句讀上口成誦不事督責所讀常倍他兒稍長與廣

業同師朱香臣先生兄之舅也塾課嚴整有法尤善辨晰訓

誥兄輒心解一日先孝廉偶舉某家兒作破承題頗可觀師

因誥兄曰若稍長顧反不能耶即拈有朋自遠方來句命破

之兄應曰學貴得朋不遠千里而來矣師嘉喜賀叔母曰他

日必以文名時年十歲寔未知所謂制義也其後友教四方

亦適如所占云兄初試為文已自有條理為先孝廉所稱賞

已未八月先孝廉見背明年兄侍先叔父贈公讀書梅里沈

氏庭訓嚴切兄亦奮勵徹寒暑晝夜不怠作文苦思冥索必求得當乃已贈公早得痰喘疾每發委頓壬戌之歲泄痢尤劇兄起居惟謹贈公恐其妨常課也叱使退則密伺其旁有所需急趨前時或怒撻卒不敢離其孝思純摯如此弱冠學成出為童子師博脯脩以贍養時廣業從叔祖近墅先生於接濟僧寮同學數十人兄間來角藝曹輩憚之屢試郡縣皆列前茅顧遇院試鄉試賦輒不利補弟子員日贈公已不及見兄每念之以為恨蓋贈公少孤力學負異材常思奮志青雲以慰先大母心既數不偶丁卯後又病不能應舉故所以

望兄者甚切甲戌十月挈兄等應試武林寓侯潮門外馬神廟感時嗽症旋作一時痰湧而歿是日兄及弟建業正局試院不及屬續案發竟無名兄抱憾終天號慟欲絕自是遇大小試贈公必見夢予杖必失喜笑必得嗚呼義方之教無間幽明抑兄之至性感通亦可見矣丙子春嘉興郡守李南六先生諱星曜訪碩師教子及婿難其人香臣先生在幕謂惟某可時兄方居贈公憂以布衣入見李公初未之奇也還觀數日驚嘆曰先生不惟學贍文高乃其立心制行皆當於古人中求之兒輩得所歸矣用是折節下交深加尊禮丁丑李

公引疾歸是年冬受知學使竇公入邑庠館近地辛巳春李公起知陝西同州創建豐登書院既成謀院長李公曰必周先生專書幣聘兄掌之院未有掌故兄為立規條定程課十邑之士來肄業者幾百人李公諸子婿亦來遊兄講貫評閱一如家塾泐寒暄未及補額者以已膏火資之先後四年獲雋甚多文風為之丕振觀察屠公極欽服之乙酉將歸諸生餽遺悉謝卻乃各製詩歌聯額書之精縑誌仰慕焉戊子春李公復起為川東道留眷徐州里第延兄課其幼子及孫先後十數年李公諸子俱有成壻則今阜陽令張護也丙申春

李公除湖北鹽道仍邀至署筆札之事悉委焉踰年李公捐館兄始歸李公故北直制府敏達公子負幹濟才所至有能名然性豪邁罕所推服久而禮敬不衰者惟香臣先生及兄二人嘗謂兄曰吾服官以來粗有治績可記唯先生知之詳而又能文幸為我筆之否則一旦奄棄誰相知述遺事者至是行狀果出兄手後梁大中丞為誌墓十九皆原文人為知己之報云李公之罷歸同州也築堂名課耕出一聯云志不在溫飽而無其對遍索人占之皆不愜後以問兄兄曰何不云平生志不在溫飽而以方寸地留與子孫對之李公大喜

拜曰謹受教即手書懸之蓋不特屬對工切而情深辭婉生
平與人交契其直諒多聞大率類此戊戌館江都楊明府署
已亥館杭州朱氏是秋

忌科少宰今大學士韓城王公學士今京尹南滙吳公實典浙試
得舉於鄉蓋自己卯闈卷梁公慎齋諱徽力薦不售庚寅興
公勉齋菴諱德薦又不售至是出鎮海縣知縣今陝西按察
使周公之房凡十一試年五十餘矣庚子會試出內閣侍讀
今太僕卿丹陽吉公門成進士例選知縣以母老改就教時
蘄陽陳大中丞節制浙閩聞兄名延教其子壬寅秋選寧波

教授之任後制府仍留入署未幾陳公以事去兄乃赴寧郡
學廳事久廢舊據尊經閣為私齋兄以為不可即詳請借俸
營建堂廡門牖煥然一新甲辰春迎養叔母于官舍初校官
積習除下車課文一次及承辦歲科試冊籍外別無事事上
官視為冗職士亦不甚親禮之兄至日汲引諸生獎進督誨
之一如書院法于是爭額手相告曰是真吾師矣及門受業
常數十人遇公事竭誠盡慎而以詩文贄者必為評定酬和
無虛日郡守陳紫岱先生諱鍾岫深相契重學使竇公臨郡
亦極嘉獎然兄之精力自此日衰耗矣兄薦於孝友自以衣

食奔走不能長侍膝下凡可以娛親者必力致之所得脯資
分毫不入私室晚始得祿養母手進豐腆有微疾朝夕奉藥
餌憂形于色與弟建業合爨終身無間言廣業之試南宮也
兒子勲懋勲常無師兄即挈至寧延同年孫容湖先生教之
勲懋幸於丙春博一衿兄之賜也廣業留京師三載餘來書
數千言誨諭勤拳無所不到春試屆期乃舉示先祖家傳中
事云居都下日朔望祇一謁唐太老師言不及私意蓋恐忘
之也廣業雖不肖敢忘祖德然非兄摯愛安得重聞此言乎
兩妹先後孀居時存恤之好讀書覃研經籍旁通百氏時藝

初尚雄深博大後喜雋永然不規一體從遊者隨材造就示
以程擬存者可千首詩宗唐宋以神韻為主古文駢體書啟
皆工雅有法雜稿甚多不自收拾惟遊秦有春暉寸草集已
抄成卷餘尚待甄錄焉家故貧賴館脩以給食指漸繁常苦
支絀又性慷慨好義輕財族姻交遊有求者雖典鬻以應不
吝也登第後事劇費多出浮于入遂債負纍纍俸薄不能償
而公私酬應日積叔母春秋高窘狀不敢以聞而憂勞乃反
遠過為諸生時年來或病咯血或患欬寒熱交作以至不
起先是壬午歸自同州以過勞得疾症甚則不省人事醫治

獲痊去秋復間發病中有答廣業寄祝六十壽言句云殘喘
強延餘一綫全家活計只孤身廣業讀之惻然知其不祥然
念先兄績學砥行天必鑒憐之使終養老母亟馳書慰問且
約今秋必歸聚首幸努力自愛豈知入春轉劇百藥罔效適
學使歲試寧郡雖蒙許假猶日強起經理諸務二月二十七
日竟以痰湧而絕嗚呼痛哉廣業同祖兄弟四人兄居長同
居合戶無異同胞廣業小於兄三歲幼同塾同師自乙卯至
戊午出入必偕於諸弟中尤見親愛自負笈及遠館於外不
能朝夕相對如童年然歲時歸里團坐一室或粘拈題搨藝

或闡韻作詩凡詞賦記序之類皆私相做倣彼此質正有善
相勸勉有過相規切深漏始罷以為常及遠遊秦楚家務率
委廣業經理兄亦間歲必歸省覲稍暇團聚如初屈指生平
契濶從未有自癸卯迄今之久者豈謂竟成永訣不得復相
見耶嗚呼痛哉兄於雍正五年丁未十一月十四日時生
乾隆五十二年丁未二月二十七日酉時卒於寧波官舍嫂
陸氏五世祖姑丈贈承德郎庠生諱慶臣公來孫女處士諱
爾達公女例授孺人子一勳元州庠生娶莊氏庠生諱誠公
女女二長許字國學唐諱觀公子庠生叔封幼未字孫二馥

增慶增聞兄卒後僚長暨諸生會弔者數百人且謀經紀其
喪旅櫬當不至淹滯獨念叔母年已八十有六孤幼孳孳廣
業遠羈燕薊不能親視兄殮又未能遙歸奉母旋里椎膺飲
泣五內如屠惟是兄一生懿行俱有可傳粗記崖畧伏願
當代立言君子俯賜採擇錫之傳銘以光泉壤不勝感激禱切
之至

功服弟周廣業拭淚頓首拜述

